

lorum, quas Cracouia discedens reliquerat, vsus requireretur. Has cum non cuius committendas censeret, mea opera in asportandis ijs vsus est. Dum igitur sum in itinere, repentinæ & continuæ pluuiæ per aliquot dies ac noctes cadunt, quibus cum non modo impeditum & periculosum iter efficeretur, bis vno die submersionis periculum incurri. Sed ille interim cum à Barone quodam euocatus, cubuisset in cōclau recens incrustato, catharro infestari cœpit. Quo adhuc vexabatur, cum redirem Cracouia. Vix autem triduū vnā fuimus, cum iterum à Magnifico ac Generoso Domino Ioan. Rubero summæ rei præfecto in Vngaria euocaretur. Morbo autem Cassouia indies propter cœli grauitatem ingrauescente, cum suffocationis periculum, adeoque mortem ipsam sibi imminere sentiret, vitæ spe deposita ad felicem emigrationem se parauit. ac missis ad Dominum Ruberum amicis, petijt, vt simul ac decessisset, mihi opus ipsius quod imperfectum relinqueret, traderetur, nulla habita ratione, vbi & quando id perficere possem. Se enim mihi ad operis confectionem necessaria aperuisse, neque se dubitare, quin operam daturus sim, vt primo quoque tempore opus absolutum ac perfectum ad posteritatem transmittatur, præsertim cum sanctè id sibi promissem. In hanc ipsius petitionem cum Dominus Ruberus consensisset, quatrduo post morbo inualecente, carissimus præceptor **GEORGIUS IOACHIMVS RHETICVS**, circa Secundam noctis in complexu meo exspirauit, cum ab ætatis suæ anno primo & Sexagesimo non longè abesset. De quo cum Dominus Ruberus nuntiasset in aulam **IMPERATORIS MAXIMI SECVNDI**, **IMPERATOR** non tantum Rhetici petitionem ratam habuit, sed & præter omnem spem & expectationem meam sumtus mihi ad operis confectionem necessarios, suppeditare iussit.

Tradidit ergo mihi Dominus Ruberus non tantum opus, vt voluit Rheticus præceptor, sed idem etiam Diplomate testatus est, iussu ac mandato **IMPERATORIS MAXIMILIANI SECVNDI** me id à se accepisse. Inde cum de sumtibus necessarijs constitutum esset, ad Tertiæ Serici continuationem accessi. Nondum verò biennium exegeram, cum præter opinionem de Imperatoris obitu nuntiū afferretur. Inde cum grauiora inciderent, quàm vt amplius nostri cura geri & haberi posset, in Magnifici Domini Ruberi tutelam & curam venimus. Is nobis de necessarijs aliquandiu prospexit. Accidit non multò post, vt ab Academia Vitebergensi iussu Electoris Saxonie Augusti, ad Matheseos professionem euocarer. Eò, cum ab Electore Academia Vitebergensis mihi impetrasset sumtus ad opus conficiendum necessarios, me contuli. Sed incidit Paulò post mutatio, quæ mihi & paucis alijs necessitatem discedendi attulit.

Inde cum annos aliquot peregrinando consumssem, autore & sua-